



Efnahagsnefnd Alþingis,
Nefndasvið Alþingis,
Austurstræti 8 – 10,
150 Reykjavík

Reykjavík 24. apríl 2006

Efni: Umsögn um breytingar á lögum um Nýsköpunarsjóð atvinnulífsins, 730. mál.

Nýsköpunarsjóður atvinnulífsins hefur frá stofnun haft þýðingarmikið hlutverk við fjármögnun nýsköpunarfyrirtækja hér á landi. Mikilvægt er að á Íslandi sé starfandi fjárfestir sem er tilbúinn til að leggja fram fé í viðskiptahugmyndir snemma á þróunarferlinu og að sá fjárfestir stuðli að því að skapa vermæti sem fyrst úr viðskiptahugmyndinni.


Impra, nýsköpunarmiðstöð á Iðntæknistofnun átti mjög gott samstarf við Nýsköpunarsjóð frá stofnun Impru fram til ársins 2002. Samstarfið fólst meðal annars í þátttöku sjóðsins í fjármögnun starfseminnar, með framlagi til sérstakra stuðningsverkefna sem Impra sá um að framkvæma. Þetta samstarf reyndist farsælt allt fram til þess að sjóðurinn varð að draga úr slíkum styrkjum vegna slæmrar fjárhagsstöðu. Í frumvarpinu er lagt til að sjóðurinn hætti að veita styrki. Þrátt fyrir að Impra, nýsköpunarmiðstöð hafi notið góðs af stuðningi Nýsköpunarsjóðs telur Iðntæknistofnun að það sé rétt stefna að sjóðurinn einbeiti sér að fjárfestingum og leggi af styrkveitingar. Slíkt mun skerpa stefnu og vinnulag sjóðsins. Ástæða er þó til að vekja athygli á mikilvægi þess að íslensk fyrirtæki hafi aðgang að stuðningi til nýsköpunar og þróunarstarfs, hliðstæðum þeim stuðningsverkefnum sem Impra stóð fyrir í nafni Nýsköpunarsjóðs. Í dag hafa fyrirtæki á höfuðborgarsvæðinu afar takmarkaðan aðgang að slíkum stuðningi. Mikilvægt er að slíkur stuðningur sé fyrir hendi fyrir fyrirtæki um allt land. Mikilvægt er að fjármagni sé veitt til slíkra verkefna úr Átaki til atvinnusköpunar og/eða Tækniþróunarsjóði, en til þess að svo geti orðið er mikilvægt að sjóðurinn vaxi enn frekar.

Gert er ráð fyrir að hlutverk Nýsköpunarsjóðs breytist og sjóðurinn taki nú aðeins þátt í „fjárfestingum í sprota- og nýsköpunarfyrirtækjum.“ Í greinargerðinni með frumvarpinu kemur fram að verulegur skortur hafi verið á framboði fjármagns til fjárfestinga í sprotafyrirtækjum. Iðntæknistofnun tekur undir þessi sjónarmið. Fram kemur í athugasemdum við lagafrumvarpið að með þessu er átt við sprotafyrirtæki sem verja meira en 10% af veltu í viðurkennda rannsókn- og þróunarstarfsemi. Iðntæknistofnun tekur undir mikilvægi þessarar áherslu, en leggur áherslu á að fyrirtæki á breiðu sviði atvinnulífsins verða að hafa aðgang að fjármögnun nýsköpunarverkefna. Hér er átt við fyrirtæki á sviðum skapandi greina, þjónustustarfsemi o. fl. Þó að gera megji ráð fyrir að nýir samlagssjóðir muni koma að fjármögnun verkefna á þessum sviðum má ekki útiloka fyrirtæki sem starfa á þessum sviðum frá fyrirgreiðslu Nýsköpunarsjóðs.

Nýrri heimild sjóðsins og auknum fjármunum til að taka þátt í samlagssjóðum og samlagshlutfélögum er fagnað. Vænta má að með þátttöku Nýsköpunarsjóðs og öflugra fjárfesta s.s. lífeyrissjóða, verði til áhættufjárfestingarsjóðir sem stuðla munu að öflugri nýsköpun hér á landi á komandi árum.

Rannsóknir á starfi hliðstæðra sjóða hafa sýnt fram á að mikilvægt er að sjóðirnir sérhæfi sig í tilteknum tegundum fjárfestinga. Áhættufjárfestingasjóðir þurfa að vera áhrifafjárfestar, þar sem þeir koma að rekstri fyrirtækja með beinum hætti í stjórnir og hafa áhrif á viðskiptastefnu, stefnumótun og framtíðarsýn, ráðningu stjórnenda, leiðsögn um viðskipti, markaði og stjórnun, tengsl við birgja, banka, aðra fjárfesta o.s.frv.

Virðingarfyllst,



Hallgrímur Jonasson

Forstjóri Iðntæknistofnunar



Berglind Hallgrímsdóttir

framkvæmdastjóri Impru